



## STINAPA TA INFORMA

### 'SINTI' E NATURALESA

Ken por a kere? E mesun duanero kara severo aki tin masha amor i delikatesa pa ku animalnan i naturalesa en general. Cliff Frans, kasá i ku dos yu, ademas di ta 'hoofdkommies' di duana, ta fotógrafo, kamarógrafo i guia di turista. Pues den tur su ofishinan e ta enkontrá su mes diariamente ku turistanan. No tin un mainta ku Cliff no ta lanta sin sinti' é orguyoso di su isla. E aire puru, limpi, natural ku e ta lanta respirá. Su promé ritual tur mainta? Duna pan na paranan di mondi. "Paranan no ta papia pero ta ekspresá kosnan asina grandi. Por ehèmpel e union di paranan ora nan ta kome huntu, miéntras nos komo hende no ta hasi' é", e ta akklará. Pa Cliff ta importante ku tin áreanan di protekshon. Es mas, mester bin más área di protekshon mes! Entrada i progreso pa Boneiru ta positivo pero mester tin un balansa entre naturalesa i progreso ekonómiko. Asta abo komo individual por yuda mantené e balansa. Enbes di rosa henter un tereno, laga sikiera un palu keda para. Segun Cliff nos a bira masha 'makaku', apresiendo kosnan di afó mas. "Nos ker un hotèl mas grandi, pero ki ta para di e animalnan nan hogar?" E ta supliká pa nos 'siña' stima nos lugá atrobe enbes di otro lugánan. "Disfrutá di shimaruku, enbes di frutanan di afó." Sin duda, su kunuku ta su lugá favorito den naturalesa. Cliff sa yega lat fo'i trabou i drumi wak streanan. "E zonidonan di anochi i 'sinti' e lus di streanan ta un forma di meditashon pa mi." Ora e yega kas bèk, e ta drumi masha dushi mes. Su segundo lugá favorito ta e kuebanan na Boneiru. Ademas di e zonidonan spesífiko di e kueba, Cliff ta hustamente enkantá ku e 'silensio' di e kueba. Su kueba favorito ta esun tras di airopuerto. "Bo ta paga e lus di flèshlait i 'sinti' e silensio 'zona' rònt di bo. Nan sa bisa ku naturalesa di un pais ta parti di su rikesa. Pa mi sin naturalesa un pais ta morto. Sin naturalesa norma, balornan i mentalidat kompletu di bo pais ta kambia (negativamente)." P'esei Cliff ta pidi nos tur pa tur mainta ora bo lanta fo'i kama, habri bentana òf bai pafó, hala rosea profundo i bisa "Ah Boneiru, mi ta orguyoso di por biba aki!"

*Skirbí pa Natalie Wang.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**